

Tema 2: Savaha ra Noee iin tundoo

Nu vachi chi [Base]: Genesis cap. 6:9-22, cap. 7, 8, 9.

Cha cuni yo cha na cua coto ve cuati [Propósito]: Ra Ndioo cuni xaan chihin yo ta cuni ra sacacu ra chi yo.

Yaa cha cua cata tiñu [Canto]: Mi barco es pequeño

TICHI TESTAMENTU CHAHNU CAHAN MAA RA NDIOO CHI MAI,
ÑAAN NI TAHAN ÑIVI MAA RA QUIVI ITI CHATA XAAN
TICHI TESTAMENTU CHAA NI CAHAN MAA RA NDIOO CHI MAI
ÑAAN SAVAHA ÑI CUU ÑIVI NDIOO

CORO

CAHNU XAAN CUU RA NDIOO RA SUTI
CAHNU XAAN CUU JESUCRISTO
CAHNU XAAN CUU TATI NDIOO
CAHNU XAAN CUU MAA RA NDIOO

RA CATI TUHUN TUHUN NDIOO CUU NOEE RA VAHA XAAN,
NDIHI CA ÑIVI ÑA SACHAHNU ÑI CHA CATI MAA RA NDIOO,
IIN TUNDOO SAVAHA RA NOEE TA QUIHVI ÑIVI RA,
ÑAHNI NI TAHAN ÑI CHA CUUN SAVI.

1. ¿Yoo cuu ra Noee? [¿Quién es Noé?] Gen.6:9

Cuu ra iin rai cuiti, ta vaha xaan tasoho ra chi ra Ndioo, ta ituhun ni maa ra Noee savaha cuhva cuni ra Ndioo. Ta chacoo uni tahan sehe ra, ra Seem chi ra Caam chi ra Jafeet.

2.- Cha cati ra Ndioo cha cua savaha ra Noee [Gen. 6:11-22].

Ta cati ra Ndioo chi ra Noee ti: “Cha saxini yu cha cua sanain chi ndihi ñivi ñuñivi, vati mani cha ndavaha ni ndacu ñivi ñuñivi, ta mani cha ca cani tahan

ñi cuni ñi iti nuu ra Ndioo. Ta ndehe ra Ndioo cha tivi nu ñuhun ñuñivi. Ta chacan cua savahun iin tundoo

cha uni toto chi, vati cua savahi cha cua cuun savi xaan, ta cuaha xaan nduta cua ndoo nu ñuhun ñuñivi ya, ta cua quihvi ndihi ndo tichi tundoo can. Cua quihvi maun, cua quihvi ñasihi cun, cua quihvi nduni tahan sehe cun, ta cua quihvi tahan ñasihi ra ta ra. Ta cua quihvi uvi uvi ri quti cuhu iyo nu ñuhun ñuñivi cuhva iin iin tata ri, vati tacan ña cua cuvi ri ta ri. Cua quihvi iin ri ii, ta iin ri sihi chihin cun. Ta cua cundaca cun ndihi nuu ri quti cuhu cha iyo nu ñuhun ñuñivi ya tichi tundoo can, ndihi ri saa chi ndihi ri quti cuhu cha cuu sana ñivi, iin ri ii ta iin ri sihi, ta tacan cua coo ndito tahan ri ta ri cuhva iin iin tata ri”, cati ra Ndioo chi ra Noee. Ta savaha ra Noee ndihi tiñu cha chaha ra Ndioo chi ra.

3.- Sacuun ra Ndioo savi xaan 7:1-24

Ta nu ni ndihi savaha ra tundoo can, ta cati ra Jehovaha Ndioo chi ra Noee ti: “Quihvi chi ndihi ñivi cun tichi tundoo can, vati ituhun yoho iyo cuiti vaha cuhva cuni yu, ta ñavi ca ndihi ñivi ñuñivi. Ta ndihi ri quti cuhu cha cuu cachi ndo cua quihvi ucha ri ii ta ucha ri sihi, ta ituhun ni ri ii chi iin ri sihi cha ña cuu cachi ndo. Ta quivi quechaha cuun savi can, quihvi ra Noee chi ñasihi ra tichi tundoo can chi nduni tahan sehe rai ra, ra Seem chi ra Caam chi ra Jafeet, chi ñasihi ra ta ra. Quihvi ñi ta ñi, ta quihvi tahan ndihi nuu ri quti cuhu cha iyo tichi cuhu chi ndihi ri cuu sana ñivi cuhva iyo iin iin tata ri, ta chi ndihi ri quti cuhu chica chi tichi nu ñuhun, ta quihvi tahan ndihi ri saa cuhva iyo iin iin tata ri ta ri. Ta chasi ra Jehovaha Ndioo yuhu tundoo can.

Tacan cuu, ta cuun savi xaan uvi xico quivi nu ñuhun ñuñivi ya, chitu nduta niniin cahnu nu ñuhun ñuñivi. Ta ni cahndi nduta cha iyo tichi ñuhun, ta nuna cahnu tahan chi nduta iyo iti siqui andivi. Ta quechaha nandaa nduta, ta chacan nandaa tahan tundoo can nu nduta can. Ta nandaa ca nduta nu ñuhun ñuñivi, ta suta tundoo can nu nduta cahnu can. Ta cuahan ca nandaa nduta can, ta yaha chi inga ucha metru siqui ndihi yucu sucun cha iyo nu ñuhun ñuñivi ya. Cuhva can chihi ndihi cha iyo ndito ta xita tati chi nu ñuhun ñuñivi. Ta cientu uvi xico uchi quivi caa nduta can nu ñuhun ñuñivi.

4.- Cha cuiñi cha cuun savi xaan, ta tiso vaha ra Ndioo tiñu chi ra Noee [Gen. 8]

Ta chacahun ini ra Ndioo chi ra Noee chi ndihi ri quti cuhu cha iyo chi ra tichi tundoo can, ta savaha ra Ndioo cha yaha tati nu ñuhun, ta nanuun nduta can. Ta cuhva can ni chacundasi nu cahndi nduta tichi ñuhun, ta nu coyo

cahnu chi nduta iti siqui andivi, ta cha cuiñi cha cuun savi can. Ta quechaha nanuun nduta can suhva suhva nu ñuhun ñuñivi, ta cuu chi cientu uvi xico uchi quivi, ta ndoco nduta can nu ñuhun. Ta ndoo tundoo can siqui yucu cahnu Araraat quivi chahun uvi nda yoo ucha.

Ta nu queta uvi xico quivi, ta nuna ra Noee vendana tundoo cha savaha ra, ta saña iin ri ndivi uni uvi chaha ta ni queta ndico ri tau ni chaha ni queta ndico ri ndivi can, ta indi yuhu ri iin ndaha numa yutun olivu, ta cuhva can nihin tuni ini ra Noee cha cha vachi ndu iti nu ñuhun ñuñivi. Ta chatu ra inga ucha quivi, ta sa sacuhun tucu ra chi ri ndivi can, soco ñahni ca ri queta nu indi ra.

Ta iyo ra Noee iñu cientu ituhun cuiya ra, ta chacoo ndihi chacan. Ta savaha ra Noee iin altaar yuu iti nuu ra Jehovaha Ndioo, ta ni quihin ra iin iin nuu ri quiti cuhu vaha chi ndihi ri saa vaha, ta samani ra chi ri chi ra Ndioo, vati cua cayu ri nu altaar yuu can iti nuu ra. Ta nu ni queta xico vixin yuhma ri quiti cuhu cha cayu iti nuu ra Jehovaha Ndioo, saxini ra chi anima ra ti: “Ña cua tachi tuni que ndihi cha ndito iyo nu ñuhun cha cuenda cha ndavaha ni savaha ñivi ñuñivi, vati nda ni tivaa ñi, ta saxini ñi ndavaha ni chi anima ñi, ta chacan ña cua sanaan que ndihi cha iyo cuhva cha ni savahi vitin”, saxini ra Ndioo.

Ta cati ndico ra Ndioo chi ra Noee chi ndihi sehe ra ti: “Vitin quivi ya cua tiso vahi tiñu chihin ndo chi ndihi tata ndo cha vachi iti nuu. Ta tiso vaha tahin tiñu chi ndihi ri quee chihin ndo tichi tundoo can chi ndihi ri saa chi ndihi ri quiti cuhu sana ndo chi ndihi ri iyo tichi cuhu. Vitin ndoo vaha tiñu ya chihin ndo, vati ña cua sanaan ca yu ni inga ca chaha ndihi cha ndito iyo nu ñuhun ñuñivi chi savi xaan”, cati ra.

Ta cati ndico tucu ra chahnu Ndioo ti: “Cua tiso yu iin cuyohndi iti nu vico, vati cua cuu chi iin seña ndihi tiempu cha vachi iti nuu, vati cha ni tiso vahi tiñu chihin ndo chi ndihi cha ndito iyo nu ñuhun ñuñivi. Cua ndehe ndo cuyohndi can hora cha cua coo vico savi nu ñuhun ñuñivi. Ta cua cucuhun ini yu tiñu cha tiso vahi chihin ndo chi ndihi cha iyo ndito nu ñuhun ñuñivi, vati ña cua coo ca savi xaan cha cua sanaan chi ndihi cha iyo ndito nu ñuhun ñuñivi. Ta cha cua cunda cuyohndi can iti nu vico, ta cua ndehi chi, ta cua cucuhun ini yu tiñu cha ni tiso vahi chi ndihi ñivi ñuñivi chi ndihi cha ndito iyo nu ñuhun. Chacan cuu seña cuenda tiñu cha ni tiso vahi chi ndihi ñivi, ta chi ndihi quiti cuhu cha iyo ndito nu ñuhun ñuñivi”, cati ra Ndioo chi ra Noee.

Conclusión: Cuni ra Ndioo cha na cua tasoho yo chi ra.

Texto a memorizar: Ta cha cua cunda cuyohndi can iti nu vico, ta cua ndehi chi, cua cucuhun ini yu tiñu cha ni tiso vahi chi ndihi ñivi ñuñivi chi ndihi cha ndito iyo nu ñuhun. Genesis 9:16

Preguntas

1.- ¿Ñaan cuhva cha coo ra Noee? R= Cuu ra iin rai cuiti, ta tasoho ra chi ra Ndioo

2.- Yoso tahan sehe ra Noee chacoo ta ñaan nani ra ta ra? R= Seem, Caam chi Jafeet

3.- ¿Ñaan cati ra Ndioo cha cua savaha ra Noee? R= Iin tundoo

4.- Ñacu cati ra Ndioo cha na cua savaha ra Noee iin tundoo? R= Vati cua sacuun ra savi xaan.

5.- Yoso tahan ñivi cacu cha cuun savi xaan ta yoo ni? R= Una tahan, maa ra Noee chi ñasihi ra chi ndihi uni sehe ra chi uni chanu ra.

Dibujo:

